




初唐四傑集
駱丞集
全

詩文
卷一
十
九

土岐文庫
文庫17
W54
9



文庫 17
W54
9

唐書文苑傳

駱賓王婺州義烏人少善屬文尤妙於五言詩常作帝京篇當時以爲絕唱然落魄無行好與博徒遊高宗末爲長安主簿坐賊左遷臨海丞怏怏失志棄官而去文明中與徐敬業於揚州作亂敬業軍中書檄皆賓王之詞也敬業敗伏誅文多散失則天素重其文遣使求之有兗州人郗雲卿集成十卷盛傳於世

昭和六十年二月一日
土岐善吉唐氏寄贈

010185191414

夏日遊德州贈高四 有序

在江南贈宋五之問

七言古風

上吏部侍郎帝京篇 有啟

疇昔篇

行軍軍中行路難

行路難

豔情代郭氏答盧照鄰

代女道士王靈妃贈道士李榮

卷二

五言律詩

遊紫霞觀 有序

在獄詠蟬 有序

途中有懷

出石門

至分陝

至汾水戍

北眺春陵

望鄉夕泛

久客臨海有懷

遊究部逢孔君自衛來欣然相遇若舊

西京守歲

白雲抱幽石

春雪處處生

同辛簿簡仰酬思立上人林泉四首

秋日送陳文林陸道士有序

秋日送尹大赴京有序

秋夜送閣五還潤州有序

初秋登王司馬樓宴有序

初秋於竇六郎宅宴有序

送鄭少府入遼共賦俠客遠從戎

送費元之還蜀

秋日送侯四

送王明府參選賦得鶴

秋日送別

別李嶠得勝字

在兗州餞宋五之問

遊靈公觀

夏日遊山家同夏少府

夏日遊目聊作

同崔駙馬曉初登樓思京

春夜韋明府宅宴

冬日宴

饜鷄子

詠雲酒

詠美人在天津橋

憲臺出紮寒夜有懷

月夜有懷簡諸同僚

送郭少府探得憂字

送宋五之問得涼字

冬日過故人任處士書齋

詠塵灰

秋晨同淄州毛司馬九咏

秋風

秋雲

秋蟬

秋露

秋月

秋水

秋雁

秋螢

秋菊

詠雪

詠水

詠雁

餞駱四二首

渡瓜步江

王昭君

樂大夫挽詩五首

丹陽刺史挽詩三首

五言排律

浮查有序

春霽早行

秋日山行簡梁大官

晚度天山有懷京邑

晚泊河曲

晚泊蒲類津

晚渡黃河

早發淮口望盱眙

遠使海曲春夜多懷

晚泊江鎮

早發諸暨

晚憩田家

宿山莊

過張平子墓

海曲書情

邊城落日

蓬萊鎮

宿溫城望軍營

和孫長史秋日卧病

四月八日題七級

早秋出塞寄東臺詳政學士

餞鄭安陽入蜀

在軍中贈先還知己

夏日憶張二

和李明府

望月有所思

寓居洛濱對雪憶謝二

西行別東臺詳政學士

送吳七遊蜀

春晚從李長史遊開道林故山

和王記室從趙王春日遊陔山寺

冬日野望

夕次舊吳

過故宋

詠懷

邊夜有懷

久戍邊城有懷京邑

幽繫書情通簡知己

寒夜獨坐遊子多懷簡知己

敘寄員半千

棹歌行

傷祝阿王明府 有序

五言絕句

在軍登城樓

易水送人

挑燈杖

詠塵

翫初月

詠鏡

詠鵝雜言

七言絕句

憶蜀地佳人

卷三

啟

和學士閨情詩啟

上司刑太常伯啟

上李少常啟

上兗州啟

上兗州崔長史啟

上齊州張司馬啟

上廉使啟

上瑕邱韋明府啟

上郭贊府啟

上梁明府啟

書

上吏部裴侍郎書

與程將軍書

答員半千書

與博昌父老書

與親情書

又

卷四

序

秋日於益州李長史宅宴序

冒雨尋菊序

晦日楚國寺宴序

餞宋三之豐城序

初春邪嶺送益府參軍序

秋日餞麴錄事使西州序

贈李八騎曹詩序

揚州看競渡序

秋日與羣公宴序

雜著

兵部奏姚州破逆賊諾沒弄楊虔柳露布

兵部奏姚州破賊設蒙儉等露布

為齊州父老請陪封禪表

策三道

代徐敬業討武氏檄

應詰

自敘狀

祭趙郎將文 代李義作

駱丞集目錄

駱丞集卷一

頌

靈泉頌

聞夫元功幽贊靈心以有德是親至道冥符篤行以通

神一作仁為本若乃天經地義色養叶於因心夏清冬温

愛敬宏於錫類下逮六幽之奧上洞三光之精不有至

誠孰云斯感有廣平宋思禮字過庭皇朝永州刺史昉

之適孫戶部員外順之長子幼丁偏罰早喪慈親永懷

鞠養之恩長增思慕之痛弱不好弄長而能賢趨庭聞



詩禮之風亢宗勛曾閔之行事後母徐以至孝聞北面
 與悲泣高堂而咎已東遊下位歡微祿以逮親調露二
 年來佐百里俯就微班之列將申返哺之情苟立身其
 若斯於從政乎何有時歲亢旱金石行銷遠近川原殆
 將堙絕濬井皆為湯谷通波盡化污池太夫人在遲暮
 之年有溫勞之疾非濫漿不可以適口非源泉不可以
 蠲痾色養既虧憂惶靡訴俄而廳堦之下忽清泉自生
 因疏導其源遂流注不竭味甘若醴氣冷如冰此邑城
 控剡山一作溪地連禹穴基址多石岡阜無津爰自興建

以來久微穿汲之利非精誠貫於有道純志浹於無私
 孰能洽冥貺以通幽導靈泉而致養者也昔漢臣忠烈
 窮井飛於一言姜婦孝思潛波移於七里靜惟陳迹彼
 亦何人蕭縣尉柳冕耿介之士也道合則金蘭若膠漆
 情異則軒冕猶埃塵片善可嘉朝聞甘於夕死一諾猶
 重黃金賤於白圭以為執友素交豈輕肥利祿之謂也
 賞音達禮寧鐘鼓玉帛之云乎所耻者沒而無稱所貴
 者存而不朽徒懷美志未遇良材某出贊荒隅塗經勝
 壤三秋客恨長懷宋玉之悲一面交歡暫雪桓譚之涕

觀斯水之清泚感若人之精誠見賢思齊仰圭璋而有
地揮毫興頌鏤琬琰以無慚乃作頌曰

粵若稽古厥初生民其誰不孝獨我難倫義不悖道仁
不遺親愛敬盡力孝弟通神顧我罔極因心感至冥契
動天甘泉涌地洽洽無竭蒸蒸不匱曾是我私永錫爾
類爰有芳人景行芳塵事諧則感道洽斯親孝爲禮主
名爲實賓倘斯文之不墜知盛德之有隣

蕩子從軍賦

胡兵十萬起妖氛漢騎三千掃陣雲隱隱地中鳴戰鼓
迢迢天上出將軍邊沙遠離風塵氣塞草長萎霜露文
蕩子辛苦十年行回首關山萬里情遠天橫劍氣邊地
聚笳聲鐵騎朝常警銅焦夜不鳴抗左賢而列陣比右
校以疏營滄波積凍連蒲海雨雪凝寒遍柳城若乃地
分元徼路指青波邊城煖氣從來少關塞元雲本自多
巖風凜凜將軍樹苦霧蒼蒼太史河旣拔距而從軍且
揚麾而挑戰征旆凌沙漠戎衣犯霜霰樓船一舉爭沸
騰烽火四連相隱見戈文耿耿懸落星馬足駸駸擁飛

電終取雋而先鳴豈論功而後殿征夫行樂踐榆溪倡
 婦銜怨坐空閨藤蕪舊曲終難贈芍藥新詩豈易題池
 前怯對鴛鴦伴庭際羞看桃李蹊花有情而獨笑鳥無
 恨而恒啼蕩子別來年月久賤妾空閨更難守鳳凰樓
 上罷吹簫鸚鵡杯中休勸酒同道書來一雁飛此時緘
 怨下鳴機裁鴛帖夜被薰麝染春衣屏風宛轉蓮花帳
 夜月玲瓏翡翠帷箇日新妝始復罷祇應含笑待君歸

螢火賦 有序

余猥以明時久遭幽熱見一葉之已落知四運之將終

淒然客之爲心乎悲哉秋之爲氣也光陰無幾時事如
 何大塊是勞生之機小智非周身之務嗟乎綈袍非舊
 白首如新誰明公冶之非孰辨臧倉之愬是用中宵而
 作達旦不瞑覩茲流螢之自明哀此覆盆之難照夫類
 同而心異者龍蹲歸而宋樹伐質殊而聲合者魚形出
 而吳石鳴苟有會於精靈夫何患於異類況乘時而變
 含氣而生雖造物之不殊亦昆蟲之一物應節不憊信
 也與物不競仁也逢昏不昧智也避日不明義也臨危
 不懼勇也事有沿情而動興因物而多懷感而賦之聊

以自廣云耳

伊元功之播氣有丹鳥之賦象順陰陽而亭毒資變化
而含養每寒潛而暑至若知來而藏往既發揮以外融
亦含光而內朗若夫小暑南收大火西流林塘改夏雲
物迎秋忽臨虛而赴遠乍排叢而出幽如火齊之宵映
如夜光之暗投逝將歸而未返忽欲去而中留入槐榆
而燄發若改燧而環周繞堂皇而影泛疑秉燭以嬉遊
點綴懸珠之網隱映落星之樓乍滅乍興或聚或散居
無定所習無常翫曳影周流飄光凌亂泛豔乎池沼徘徊

徊乎林岸狀火井之沈熒似明珠之出漢值衝飆之不
烈逢淫雨而逾煥炤灼兮若湛虛之夜飛的皪兮像招
搖之夕爛與庭燎而相炫然重陰於已昏共燭火而齊
息避太陽於始旦爾其光不周物明足自資偶仙鼠而
伺夜對飛蛾之赴燧類君子之有道入暗室而不欺同
至人之無迹懷明義以應時處幽不昧居照斯晦隨隱
顯而動息候昏明而進退委性命兮幽元任物理兮推
遷化腐木而含彩集枯草而藏烟不貪熱以苟進每和
光而曲全豈如鎔金而自鑠寧學膏火之相煎陋蟬蛻

之習蛻怵螻蟻之慕羶匪傷蜉蝣之文不羨龜鶴之年
搶榆飛而控地搏扶起而垂天雖小大之殊品豈逍遙
之異筌夫何化之斯化無使然而自然乃若有來斯通
無往不至排朱門而獨遠昇青雲而自致匪偷光於鄰
壁寧假輝於陽燧終徇已以致能靡因人而成事物有
感而情動迹或均而心異響必應之於同聲道固從之
於同類殆未明於趨舍庸詎識其旨意子尚不知魚之
爲樂吾又安能知螢之爲利高明兮有融遷變兮無窮
牛哀倏而化虎羽泉忽兮生熊血三年而藏碧魂一變
而成虹知戰場之有燐悟寃獄之爲蟲彼翾飛之弱質
尚矯翼而凌空何微生之多躑獨宛頸以觸籠異璧光
之照廡同劍影之埋豐覬道迷而可復庶幽鑿而或通
覽光華以自照顧形影以相弔感秋夕以殷憂歎宵行
以熠燿熠燿飛兮絕復連殷憂積兮明且煎見流光之
不息愴驚魂之屢遷如過隙兮已矣同奔電兮忽焉儻
餘光之可照庶寒灰之重然

五言古詩

詠懷古意上裴侍郎

三十二餘罷鬢是潘安仁四十九仍入年非朱買臣縱
橫愁繫越坎壈倦遊秦出籠窮短鬪委轍涸枯鱗磨鉛
不霑用彈鋏欲誰申天子未驅策歲月幾沈淪輕生長
慷慨效死獨殷勤徒歌易水客空老渭川人一得視邊
塞萬里何苦辛劍匣胡霜影弓開漢月輪金方一作動
秋色鐵騎拍風塵爲國堅誠欵捐軀忘賤貧勒功思比
憲決策暗欺陳若不犯霜雪虛擲玉京春

夏日遊德州贈高四

有序

夫在心爲志發言爲詩詩有不得盡言言有不得盡意

僕少負不羈長逾虛誕讀書頗存涉獵學劍不待窮二
進不能矯翰龍雲退不能棲神豹霧撫循諸已深覺勞
生而太夫人在堂義須奉檄因仰長安而就日赴帝鄉
以望雲雖史闕三冬而書勞十上嗟乎入門自媚誰相
謂言致使君門隔於九重中堂遠於千里旣而交非得
免路是亡羊幸而敬止做廬榻來初服遂得載披玉葉
欵洽金蘭傾意氣於一言締風期於千祀雖交因意合
資得意以敦交道契言忘少寄言而詮道是以輕投木
李以代疎麻章句繁蕪心神媿惡庶宏雅韻竚辱報章

則紫氣連星開龍文於劍匣素輝虧月領驪頷於珠胎
云耳

日觀隣全趙星臨俯舊吳隔津開巨浸稽阜鎮名都紫
電浮劍匣青山孕寶符封疆恢霸道問鼎競雄圖神光
包四大皇威震八區風煙通地軸星象正天樞天樞限
南北地軸殊鄉國闢門通舜賓比屋封堯德言謝垂鈞
隱來參負鼎職天子不見知羣公詎相識未展從東駿
空戢圖南翼時命欲何言撫膺長歎息歎息將如何遊
人意氣多白雪一作雲梁山曲寒風易水歌泣魏傷吳起

思趙切廉頗悽斷韓王劍生死翟公羅羅悲翟公意劍
負韓王氣驕餌去易論忌途良可畏夙昔懷江海平生
混涇渭千載契風雲一言忘賤貴去去訪林泉空谷有
遺賢言投爵里刺來泛野人船締交君贈縞投分我忘
筌成風郢匠斲流水伯牙絃牙絃忘道術漳濱恣閒逸
聊安張蔚廬詎掃陳蕃室虛室狎招尋敬愛混浮沈一
諾黃金信三復白圭心霜松貞雅節月桂朗冲襟靈臺
萬頃濬學府九流深談元明毀璧拾紫陋羸金鷺濤開
碧海鳳彩綴詞林林虛星華映水徹霞光淨霞水兩分

紅川源四望通霧捲天山靜煙銷太史空鳥聲流迥薄
 蝶影亂芳叢柳陰低塹水荷氣上薰風風月芳菲節物
 華紛可悅將歡促席賞遽爾又歸別積水帶吳門通波
 連禹穴贈言雖欲盡機心庶應絕潘岳本自閒梁鴻不
 因熱一瓢欣狎道三月聊棲拙棲拙隱金華狎道訪仙
 查放曠愚公谷消散野人家一頃南山豆五色東陵瓜
 野衣裁薜荔一作葉山酒酌藤花白雲離望遠青溪隱路
 賒倘憶幽巖桂猶冀折疎麻

在江南贈宋五之問

井絡雙源濬潯陽一作陽侯九派長淪波通地穴委輸下歸
 塘別島籠朝蜃連洲擁夕陽韞珠成積澗讓壁動浮光
 浮光凝折水積澗疎圓吐玉輪涵地開劍匣連星起風
 煙標迴秀英靈信多美懷德踐遺芳端操慙謀已謀已
 謬觀光牽迹強悽惶揆拙迷三省勞生昧兩忘彈隋空
 被笑獻楚自多傷一朝殊默語千里異炎涼炎涼幾遷
 貿川陸疲臻湊積水架吳濤連山橫楚岫風月雖殊昔
 星河猶是舊姑蘇望南浦邯鄲通北走北走平生親南
 浦別離津瀟湘一超忽洞庭多苦辛秋江無綠芷寒汀

有白蘋采之將何遺故人漳水濱漳濱已遼遠江潭未
 旋返為聽短歌行當想長洲苑露金薰菊岸風佩搖蘭
 坂蟬鳴稻葉秋雁起蘆花晚晚秋雲日明亭泉風霧清
 獨負平生氣空牽搖落情占星非聚德夢月詎懸名寂
 寥傷楚奏悽斷泣秦聲秦聲懷舊里楚奏悲無已郢路
 少歌人叢臺富奇士温輝凌愛日壯氣驚寒水一顧重
 風雲三冬足文史文史盛紛綸京洛多風塵猶輕五車
 富未重一囊貧李仙非一作悲易託蘇鬼曲一作尚難因不
 惜勞歌盡誰為聽陽春

七言古風

上吏部侍郎帝京篇 有啓

某啓昨引注日垂索鄙文拜手驚魂承恩累息楚翬丹
 質在荆南以多慙遼豕白頭望河東而載惡某散樗易
 朽蟠木難容雖少好讀書無謝高鳳而老不曉事有類
 揚雄徒以易象六爻幽贊通乎政本詩人五際比興在
 乎國風故體物成章必寫情於小雅登高能賦豈圖容
 於大夫蓋欲樂道遺榮從心所好非敢希聲刻鵠竊譽
 雕蟲至若質醜行以自媒銜庸音而苟進固立身之歧

路行已之外篇矣君侯蘊明畧以佐時虛靈臺以照物
觀梁父之曲識卧龍於孔明聽康衢之歌得飯牛於寧
戚是用異人翹首俊乂歸誠猥以鄙賤之姿謬奉清通
之盼雖仲由之瑟終闕響於邱門而宋玉之謠儻均音
於郢路敢忘下里輕冒上呈庶道叶起予陳卜商之四
始恐吾幾失子効然明於一言拜手增慙憂心如醉謹
啓

山河千里國城闕九重門不覩皇居壯安知天子尊皇
居帝里嶠函谷鵲野龍山侯甸服五緯連影集星躔八
水分流橫地軸秦塞重關一百二漢家離宮三十六桂
殿欽岑對玉樓椒房窈窕連金屋三條九陌麗城隈萬
戶千門平日開複道斜通鳩鵲觀交衢直指鳳凰臺劍
履南宮入簪纓北闕來聲名冠寰宇文物象昭回鉤陳
肅蘭祀璧沼浮槐市銅羽應風迴金莖承露起校文天
祿閣習戰昆明水朱邸抗平臺黃扉通戚里平臺戚里
帶崇墉炊金饌玉待鳴鐘小堂綺帳三千疊大道青樓
十二重寶蓋雕鞍金絡馬蘭腮繡柱玉盤龍綺柱璇題
粉壁映鏘金鳴玉王侯盛王侯貴人多近臣朝遊北里

暮南鄰陸賈分金將燕喜陳遵投轄正留賓趙李經過
密蕭朱交結親丹鳳朱城白日暮青牛一作巾紺幘紅塵
度俠客珠彈垂楊道倡婦銀鉤採桑路倡家桃李自芳
菲京華遊俠盛輕肥延年女弟雙飛入羅敷使君千騎
歸同心結縷帶連理織成衣春朝桂樽樽百味秋夜蘭
燈燈九微翠幌珠簾不獨映清歌寶瑟自相依且論三
萬六千是寧知四十九年非古來名利若浮雲人生倚
伏信難分始見田竇相移奪俄聞衛霍有功勳未厭金
陵氣先開石槨文朱門無復張公子灞陵誰畏李將軍

相顧百齡皆有待居然萬化咸應改桂枝芳氣已銷亡
柏梁高宴今何在春去春來苦自馳爭名爭利徒爾爲
久留郎署終難遇空掃相門誰見知莫矜一旦擅豪華
自言千載長驕奢倏忽搏風生羽翼須臾失浪委泥沙
黃雀徒巢桂青門遂種瓜黃金銷鑠素絲變一貴一賤
交情見紅顏宿昔白頭新脫粟布衣輕故人故人有湮
淪新知無意氣灰死韓安國羅傷翟廷尉已矣哉歸去
來長卿辭蜀多文藻揚雄仕漢乏良媒三冬自矜誠足
用十年不調幾遭迴汲黯薪逾積孫宏閣未開誰惜長

沙傅獨負洛陽才

疇昔篇

少年重英俠弱歲賤衣冠既託寰中賞方承膝下歡邀
遊灞陵曲風月洛城端且知無玉饌誰肯逐金丸金丸
玉饌盛繁華自言輕侮季倫家九陌爭馳千里馬三條
競駕七香車掩映飛軒乘落照參差步障引朝霞池中
舊水如懸鏡屋裏新妝不讓花意氣風雲倏如昨歲月
春秋屢迴薄上苑頻經柳絮飛中園幾見梅花落當時
門客今何在疇昔交遊已疎索莫教憔悴損容儀會得

高秋雲霧廓淹留坐帝鄉無事積炎涼一朝被短褐六
載奉長廊賦文慙昔馬執戟幕前揚揮戈出武帳荷筆
入文昌文昌隱隱皇城裏由來奕奕多才子潘陸詞鋒
絡繹飛張曹翰苑縱橫起卿相未曾識王侯寧見擬垂
釣甘成白首翁負薪何處逢知己判將命運賦窮通從
來奇舛任西東不應永棄同芻狗且復飄飄類轉蓬客
鬢年年異春華歲歲同榮親未盡禮徇主欲申功脂車
秣馬辭鄉國策轡西南使瑯玕玉壘銅梁不易攀地角
天涯眇難測鶯囀蟬吟有悲望鴻來雁度無音息陽關

積霧萬里昏劍閣連雲千種色蜀路何悠悠岷峯阻且
脩迴腸隨九折迸淚忽雙流寒光千里暮露氣二江秋
長途看束馬平水見沈牛華陽舊地標神制石鏡峨眉
真秀麗諸葛才雄已號龍公孫躍馬輕稱帝五丁卓犖
多奇力四士英靈富文藝雲氣橫開八陣形橋影遙分
七星勢川平煙霧開遊戲錦城隈墉高龜望出水淨雁
文迴尋姝入酒肆訪客上琴臺不識金貂重偏惜玉山
頽他鄉冉冉消年月帝里沈沈限城闕不見猿聲助客
啼唯聞旅思將花發我家迢遞關山裏關山迢遞不可

越故園梅柳尚餘春春來勿使芳菲歇解秩欲言歸靴
袂愴多違北梁俱握手南浦共沾衣別情傷去蓋離念
惜光輝知音何所託木落雁南飛回來卧平陸春來酒
應熟相將菌閣望青溪且用藤盃泛黃菊十年不調爲
貧賤百日屢遷隨倚伏祇爲須求負郭田使我再干州
郡祿百年鬱鬱少騰遷萬里迢迢入鏡川吳江沸潮衝
日日淮海長波接遠天叢竹凝朝露孤山起暝烟賴有
邊城月常伴客旌懸東南美箭稱吳會名都隱軫三江
外塗山執玉應昌期曲水開襟重文會仙謫流音鳴鶴

嶺寶劍分輝落蛟瀨未看白馬對蘆芻且覺浮雲似車
 蓋江南節序多文酒屢經過共踏春江曲俱唱采菱歌
 舟移疑入鏡棹舉若乘波風光無限極歸楫礙池荷眺
 聽煙霞正流眄即從王事歸臚轉芝田花發屢徘徊金
 谷詩成重遊衍登高北望一作南適噴梁叟憑軾西征想潘
 掾峯開華岳聳疑蓮水激龍門急如箭人事謝光陰俄
 遭霜露侵偷存七尺影分沒九泉深窮途行泣玉憤路
 未藏金茹荼空有歎懷橘獨傷心年來歲去成銷鑠懷
 抱心期漸寥落挂冠裂冕已辭榮南畝東皋事耕鑿賓

階客院常疎散蓬徑柴扉終寂寞自有林泉堪隱棲何
 必山中事邱壑我住青門外家臨素澹濱遙瞻丹鳳闕
 斜望黑龍津荒衢通獵騎窮巷抵樵輪時有桃源客來
 訪竹林人昨夜琴聲奏悲調旭旦含嚔不成笑果乘驄
 馬發囂書復道郎官稟綸詔一作詔治長非罪曾縲絏長
 孺然灰也經溺高門有閣不會封峻筆無聞欲一作斂敷
 妙適離京兆謗還從御府彈炎威資夏景平曲況秋翰
 畫地終難入書空不自安吹毛未可待搖尾且求餐丈
 夫坎壈多愁疾契濶迤邐盡今日慎罰寧憑兩造詞嚴

科直挂三章律鄒衍銜悲繫梁

一作燕

獄李斯抱怨拘秦

格不應白髮頓成絲直為黃沙暗如漆紫禁終難叫朱

門不易排驚魂聞葉落危魄逐輪埋霜威遙有厲雪衽

一作枉

又作杜更無階含冤欲誰道飲氣獨居懷忽聞驛使發

關東傳道天波萬里通涸鱗去轍終遊海幽禽釋網便

翔空舜澤堯曦方有極讒言巧佞儻無窮誰能跼蹐依

三輔會就商山訪四翁

行軍軍中行路難

君不見封狐雄虺自成羣憑深負固結妖氛玉璽分兵

徵惡少金壇受律動將軍將軍擁旄宣廟畧戰士橫戈

靜夷落長驅一息背銅梁直指三危登劍閣閣道岩堯

起戍樓劍門遙裔俯靈邱邛關九折無平路江水雙源

有急流征役無期返他鄉歲月晚杳杳邱陵出蒼蒼林

薄遠途危紫蓋峯路澁青泥坂去去指哀牢行行入不

毛絕壁千重險連山四望高中外分區宇夷夏殊風土

交趾枕南荒昆彌臨北戶川源饒毒霧溪谷多淫雨行

潦四時流崩查千歲古漂梗飛蓬不自安捫藤引葛陟

危巒昔時聞道從軍樂今日方知行路難滄江綠水東

流駛炎洲丹徼南中地南中南斗映星河秦關秦塞阻
烟波三春邊地風光少五月瀘中瘴癘多朝驅疲斥堠
夕息倦樵歌向月彎繁弱連星轉太阿重義輕生懷一
顧東伐西征凡幾度夜夜朝朝斑鬢新年年歲歲戎衣
故灞城隅滇池水天涯望轉遙地際行無已徒覺炎涼
節物非不知關山千萬里棄置勿重陳征行多苦辛且
悅清笳楊柳曲詎憶芳園桃李人絳節紅旗分白羽丹
心白刃酬明主但令一被君王知誰憚三邊征戰苦行
路難幾千端無復歸雲憑短翰空餘望日想長安

行路難

君不見玉關塵色暗邊庭銅鞮雜虜寇長城天子按劍
徵餘勇將軍受脤事橫行七德龍韜開玉帳千里鼙鼓
疊金鉦陰山苦霧埋高壘交河孤月照連營連營去去
無窮極擁旆遙遙過絕國陣雲朝結晦天山寒沙夕漲
迷疎勒龍鱗水上開魚貫馬首山前振鵬翼長驅萬里
讐祁連分麾三命武功宣百發烏號遙碎柳七尺龍文
迴照蓮春來秋去移灰琯蘭闈柳市芳塵斷雁門迢遞
尺書稀鴛被相思雙帶緩行路難行路難誓令氛祲靜

馬本集 卷一 鄒氏刊
皋蘭但使封侯龍額貴詎隨中婦鳳樓寒

豔情代郭氏答盧照鄰

迢迢芊路望芝田眇眇函關限蜀川歸雲已落涪江外
還雁應過洛水漣洛水旁連帝城側帝宅層臺垂鳳翼
銅駝路上柳千條金谷園中花幾色柳葉園花處處新
洛陽桃李應芳春妾向雙流窺石鏡君住三川守玉人
此時離別那堪道此日空牀對芳沼芳沼徒遊比目魚
幽徑還生拔心草流風迴雪倘嫵娟驥子魚文實可憐
擲果河陽君有分賣酒成都妾亦然莫言貧賤無人重

莫言富貴應須種綠珠猶得石崇憐飛燕曾經漢皇寵
良人何處醉縱橫直如循默守空名倒持新縑成慊慊
翻將故劍作平平離前吉夢成蘭兆別後啼痕上竹生
別日分明相約束已取宜家成誠勛當時擬弄掌中珠
豈謂先摧庭際玉悲鳴五里無人問腸斷三聲爲誰續
思君欲上望夫臺端居懶聽將雛曲沈沈落日向山低
簷前歸燕並頭棲抱膝當牕看夕兔側耳空房聽曉雞
舞蝶臨階祇自舞啼鳥逢人亦助啼獨坐傷孤枕春來
悲更甚娥眉山上月如眉濯錦江中霞似錦錦字迴文

欲贈君劍壁層峯自糾紛平江淼淼分清浦長路悠悠
間白雲也知京洛多佳麗也知山色遙虧蔽無那短封
卽疎索不在長情守期契傳聞織女對牽牛相望重河
隔淺流誰分迢迢經兩歲誰能脈脈待三秋情知唾井
終無理情知覆水也難收不復下山來借問更向盧家
字莫愁

代女道士王靈妃贈道士李榮

元都五府風塵絕碧海三山波浪深桃實千年非易待
桑田一變已難尋別有仙居對三市金闕銀官相向起

臺前鏡影伴仙娥樓上簫聲隨鳳史鳳樓迢遞絕塵埃
鶯時物色正徘徊靈芝紫檢參差長仙桂丹花重疊開
雙童綽約時遊陟三鳥聯翩報消息盡言真侶出遨遊
傳道風光無限極輕花委砌惹裾香殘月窺牕覘幌色
箇時無數并妖妍箇裏無窮總可憐別有眾中稱黜帝
天上人間少流例洛濱仙駕啟遙源淮浦靈津符遠筮
自言少小慕幽元只言容易得神仙佩中邀勒經時序
簫裏尋思復幾年尋思許事真情變二八容華識少選
漫道燒丹止七飛空傳化石曾三轉寄語天上弄機人

寄語河邊值查客乍可忽忽共百年誰使遙遙期七夕
相知人意自相尋果得深心共一心一心一意無窮已
投漆投膠非足擬只將羞澁當風流持此相憐保終始
相憐相念倍相親一生一代一雙人不把丹心比元石
誰將濁水況清塵只言柱下留期信好欲將心學松蘿
不能京兆畫娥眉翻向成都騁騶引青牛紫氣度靈關
尺素頰鱗去不還連苔上砌無窮綠脩竹臨壇幾處斑
此時空牀難獨守此日別離那可久梅花如雪柳如絲
年一作去年來不自持初言別去一作寒偏在何悟春來春

更思春時物色無端緒雙枕孤眠誰分許念念嬌鶯一
種啼生憎燕子千般語朝雲旭日照青樓遲暉麗色滿
皇州落花泛泛浮靈沼垂柳長長拂御溝御溝大道多
奇賞俠客妖容遞來往寶騎連花鐵作錢香輪驚水珠
爲網香輪寶騎競繁華可憐今夜宿倡家鸚鵡杯中浮
竹葉鳳凰琴裏落梅花許輩多情偏送欸爲問春花幾
時滿千回鳥語說眾諸百過鶯啼說長短長短眾諸判
不尋千回百過浪關心何曾舉意西鄰玉未肯留情南
陌金南陌西鄰咸自保還轡歸期須及早爲想三秦一作

春狹斜路莫辭九折邛開一作關道假令白里似長安須

使青牛學劍端蘋風入馭來應易竹杖成龍去不難龍

颿去去無消息鸞鏡朝朝減容色君心不記下山人妾

欲空期上林翼上林三月鴻欲稀華表千年鶴未歸不

分淹留桑路待祇應直取桂輪飛

番禺黃濤初校

番禺沈葆和覆校

駱丞集卷一

駱丞集卷二

五言律詩

遊紫霞觀 有序

余鄉國一辭江山萬里昔年離別還同塞北之鳧今日

歸來卽似遼東之鶴先生情均得兔忘蹄之契已深路

是亡羊分岐之恨愈切不題短什何汰衷襟

碧落澄秋景元門啓曙關人疑列禦至客似令威還羽

蓋徒欣仰雲車未可攀只應傾玉醴時許寄頽顏

在獄詠蟬 有序

余禁所禁垣西是法曹廳事也有古槐數株焉雖生意可知同殷仲文之古樹聽訟斯在卽周召伯之甘棠每至夕照低陰秋蟬疎引發聲幽息有切嘗聞豈人心異於曩時將蟲響悲乎前聽嗟乎聲以動容德以象賢故潔其身也稟達人君子之高行蛻其皮也有仙都羽化之靈姿候時而來順陰陽之數應節爲變審藏用之機有目斯開不以道昏而昧其視有翼自薄不以俗厚而易其貞吟喬樹之微風韻資天縱飲高秋之墜露清畏人知僕失路艱虞遭時微纒不哀傷而自怨未搖落而

先衰聞蟪蛄之有聲悟平反之已奏見螳螂之抱影怯危機之未安感而綴詩貽諸知己庶情沿物應哀弱羽之飄零道寄人知憫餘聲之寂寞非謂文墨取代幽憂云耳

西陸蟬聲唱南冠客思侵那堪元鬢影來對白頭吟露重飛難進風多響易沈無人信高潔誰爲表予心

途中有懷

睠然懷楚奏悵矣背秦關涸鱗驚照

一作照

轍墜羽怯虛

彎素服三川化烏裘十上還莫言無皓齒時俗薄朱顏

出石門

層巖遠接天絕頂上棲烟松低輕蓋偃藤細弱鈎懸石
明如挂鏡苔分似列錢暫策爲龍杖何處得神仙

至分陝

陝西開勝壤召南分沃疇列樹巢維鵲平渚下睢鳩憩
棠疑勿翦曳葛似攀膠至今王化美非獨在隆周

至汾水戍

行役忽離憂復此愴分流濺石迴湍咽縈叢曲澗幽陰
崖嘗結晦宿莽競含秋況乃霜晨早寒風入戍樓

北眺春陵

攬轡疲宵邁驅馬倦晨興旣出封泥谷還過避雨陵山
行明照上谿宿密雲蒸登高徒欲賦詞殫獨撫膺

望鄉夕泛

歸懷到一作不安促榜犯風瀾落宿含樓近浮月帶江
寒喜遂行前志憂從望裏寬今夜南枝鵲應無繞樹難

八客臨海有懷

天涯升一作日觀地岳望星樓練光搖亂馬劍氣上連
牛草溼姑蘇夕葉下洞庭秋欲知悽斷意江上步安流

遊兗部逢孔君自衛來欣然相遇若舊

遊人自衛返背客隔淮來領蓋金蘭合忘筌玉葉開繁
華明日柳疎蕊落風梅將期重交態時慰一作不然灰

西京守歲

閒居寡言宴獨坐慘風塵忽見嚴冬盡方知列宿春夜
將寒色去年共曉光新耿耿他鄉夕無由展舊親

白雲抱幽石

重巖抱危石幽澗曳輕雲繞鎮一作仙衣動飄蓮羽蓋
分錦色連花靜苔光帶葉薰詎知吳會影長抱穀城文

春雲處處生

千里年光靜四望春雲生一作日祥光舉疎雲瑞葉
輕葢陰籠迴樹陣影抱危城非將吳會遠飄蕩帝鄉情

同辛簿簡仰酬思元上人林泉四首

聞君招隱地髣髴武陵春緝芟知還楚披榛似避秦崩
查年序積幽草歲時新一謝滄浪水安知有逸人

芳晨臨上月幽賞狎中園有蝶堪成夢無羊可觸籓忘
懷南澗藻蘓思北堂萱坐歎華滋歇思君誰為言

林泉恣探歷風景暫徘徊客有遷鶯處人無結駟來聚

花如薄雪沸水若輕雷今日徒招隱終當異鑿坏

俗遠風塵隔春還初服遲林疑中散地人似上皇時芳

杜湘君曲幽蘭楚客詞山中有春草長似寄相思

秋日送陳文林陸道士

有序

陸道士將遊西輔通莊指浮氣之關陳文林言返東吳

脩途走落星之浦於是維舟錦水藉蘭若以開筵綈騎

金隄泛榴花於祖道於時赤燦紀節一作赤煙沈節青女司辰

霜雁銜蘆舉賓行而候氣寒蟬噪柳帶涼序以含情加

以山接太行聳羊腸而飛蓋河通少海疏馬頰以合瀾

登高切送歸之情臨流感逝川之歎既而嗟別路之難

駐惜離樽之易傾雖漆園筌蹄已忘言於道術而陟陽

風雨貴抒情於詠歌各賦五言同為四韻庶幾別後有

暢離憂云耳

青牛遊華岳赤馬走吳宮玉柱離鴻怨金壘浮蟻空日

霽嶠陵雨塵起陟陽風唯當元度月千里與君同

秋日送尹大赴京

有序

尹大官三冬志暢指蘭臺而拾青薛六郎四海情深飛

桂樽而舉白於時兔華東上龍火西流劍彩沈波碎楚

蓮於秋水金暉照岸秀陶菊於寒隄旣切送歸之情彌
軫窮途之感重以清江帶地問吳會於星津白雲在天
望長安於日路入之情也寧不悲乎雖道術相忘叶神
交於靈府而風烟懸隔貴申心於翰林請振詞鋒同開
筆海人爲四韻用慰九秋

挂瓢余隱舜負鼎爾干湯竹葉離樽滿桃花別路長低
河耿秋色落月一作日抱寒光素書如可嗣幽谷竚賓行

秋夜送閻五還潤州有序

閻五官言返維桑脩途指金陵之地李六郎交深投漆

開筵浮白玉之樽於時璧彩澄虛漏輕光於雲葉珪陰
散迴搖碎影於風梧雖桂醕蘭缸斲淹留於一夕而青
山黃鶴將惆悵於九秋請勒四言俱申五際

通莊抵舊里溝水急一作泣新知斷雲飄易滯連霧積難

披傖風啼迴堞驚月遶疎枝無力勵短翰輕舉送長離

初秋登王司馬樓宴有序

司馬公千里騰光翼外臺而展足九日多暇敞麗譙以
開筵於時葭散秋灰檀移夏火鴻飛漸陸流斷吹以來
寒鶴鳴在陰上中天而警露於是殺開玉饌交雜佩而

薰蘭酒泛金翹映清樽而湛菊雖傍臨廣派有異章臺
之遊而俯瞰崇墉雅叶城隅之會物色相召江山助人
請振翰林用濡筆海

展驥端居暇登龍嘉宴同締賞三清滿承懽六義通野
晦寒陰積潭虛夕照空顧慙非夢鳥濫此厠雕蟲

初秋於竇六郎宅宴

有序

六郎道合采葵嘯懸鶉而契賞諸君情諧伐木仰登龍
以締歡於時一葉驚寒下陳柯而捲翠百花凝照淡虛
牖以披紅旣而俱欣得免之情共捨亡羊之淚物我雙

致匪石席以言蘭心口兩齊混汗隆而酌桂雖忘筮戴

笠與一作興

交態於靈臺而擗管操觚叶神心於聲一作勝

氣盍陳六義試賦一言卽事凝毫成者先唱云耳

千里風雲契一朝心賞同意盡深交合神靈俗累空草
帶銷寒翠花枝發夜紅唯將淡若水長挹古人風

送鄭少府人遼共賦俠客遠從戎

邊烽警榆塞俠客度桑乾柳葉開銀鏑桃花照玉鞍滿
月臨弓影連星入劍端不學燕丹客空歌易水寒

送費元之還蜀

星樓望蜀道月峽指吳門萬行流別淚九折切驚魂雪
影含花落雲陰帶葉昏還當三徑晚獨對一清樽

秋日送侯四

我留安豹隱君去學鵬搏歧路分襟易風雲促膝難夕
漲流波急秋山落日寒唯有思歸引悽斷爲君彈

送王明府參選賦得鶴

振衣遊紫府飛蓋背青田虛心恒警露孤影尚凌烟離
歌悽妙曲別引繞繁絃在陰如可和清響會聞天

秋日送別

寂寥心事晚搖落歲時秋共此傷年髮相看惜去留當
歌應破涕哀命返窮愁別後能相憶東陵有故侯

別李嶠得勝字

芳樽徒自滿別恨轉難勝客似遊江岸人疑上灞陵寒
更承夜永涼景向秋澄離心何以贈自有玉壺冰

在兖州餞宋五之問

淮卮一作沂泗水地梁甫汶陽東別路青驪遠離樽綠蟻

空柳寒凋密翠棠晚落疎紅別後相思曲悽斷入琴風

遊靈公觀

靈峯標勝境神府枕通川玉殿斜臨漢金堂迴架烟斷
風疎晚竹流水切寒弦別有青門外空懷元圃仙

夏日遊山家同夏少府

返照下層岑物外狎招尋蘭徑薰幽佩槐庭落暗金谷
靜風聲徹山空月色深一遣樊籠累唯餘松桂心

夏日遊目聊作

暫屏塵囂累言尋物外情致逸心逾默神幽體自輕浦
夏荷香滿田秋麥氣清詎假滄浪上將濯楚臣纓

同崔駙馬曉初登樓思京

麗譙通四望繁憂起萬端綺疏低晚魄鏤檻肅初寒白
雲鄉思遠黃圖歸路難唯餘西向笑暫似當長安

春夜韋明府宅宴

酌桂陶芳夜披薜嘯幽人雅琴馴魯雉清歌落范塵宿
雲低迴蓋殘月上虛輪幸此承恩洽聊當故鄉春

冬日宴

二三物外友一百杖頭錢賞洽袁公地情披樂令天促
膝鸞觴滿當鑪獸炭然何須攀桂樹逢此自留連

鏤鷄子

幸遇清明節欣逢舊練人刻花爭臉態寫月競眉新暈
罷空餘月詩成併道春誰知懷玉者含響未吟晨

詠雲酒

朔空會紀歷帶地舊疏泉色泛臨碭瑞香流赴蜀仙款
交欣散玉怡友悅沈錢無復中山賞空吟吳會篇

詠美人在天津橋

美女出東隣容與上天津動衣香滿路移步襪生塵水
下看妝影眉頭畫月新寄言曹子建箇是洛川神

憲臺出紮寒夜有懷

獨坐懷明發長謠苦未安自應迷北叟誰肯問南冠生
死交情異殷憂歲序闌空餘朝夕鳥相伴夜啼寒

月夜有懷簡諸同寮

閒庭落景盡疎簾夜月通山靈響似應水淨望如空棲
枝猶遶鵲遵渚未來鴻可嘆高樓婦悲思杳難終

送郭少府探得憂字

開筵杭德水輟棹艤仙舟貝闕桃花浪龍門竹箭流當
歌淒別曲對酒泣離憂還望青門外空見白雲浮

送宋五之問得涼字

願言遊泗水支離去二漳道術君所篤筌蹄余自忘霜
威侵竹冷秋爽帶池涼欲驗離襟切歧路在他鄉

冬日過故人任處士書齋

神交尙投漆虛室罷遊蘭網積窗文亂苔深屐跡殘雪
明書帳冷水淨墨池寒獨此琴臺上流水爲誰彈

詠塵灰

洛川流雅韻秦道擅苛威聽歌梁上動應律管中飛光
飄神女襪影落羽人衣願言心未翳終冀效輕微

秋晨同淄州毛司馬九咏

秋風

紫陌炎氣歇青蘋晚吹浮亂竹搖疎影縈池織細流飄
香曳舞袖帶水泛妝樓不分君恩絕執扇曲中秋

秋雲

南陸銅渾改西郊玉葉輕泛沼搖光動臨欄瑞色明蓋
陰連鳳闕陣影翼龍城誰知時不遇空傷留滯情

秋蟬

九秋行已暮一枝聊暫安隱榆非諫楚噪柳異悲潘分
形妝薄鬢鏤影飾危冠自憐疎影斷荒林夕吹寒

秋露

玉關寒色早金塘秋氣歸泛掌光逾淨添荷滴尙微變
霜凝曉液承月委圓輝別有吳臺上應溼楚臣衣

秋月

雲披玉繩淨月滿鏡輪圓裊露珠暉冷凌霜桂影寒漏
彩含疎薄浮光漾急瀾西園徒自賞南飛終未安

秋水

貝闕寒流徹玉輪秋浪清圖雲錦色淨寫月練花明泛
曲鷗絃動隨軒鳳轄驚唯當御溝上悽斷送歸情

秋雁

聯翩辭海曲搖曳指江干陣去金河冷書歸玉塞寒帶
月凌空易迷煙逗浦難何當同顧影刷羽泛清瀾

秋螢

玉虬分靜夜金螢照晚涼含輝疑泛月帶火怯凌霜散
彩縈虛牖飄花遶洞房下帷如不倦當解借餘光

秋菊

擢秀三秋晚開芳十步中分黃俱笑日含翠共搖風碎
影臨流動浮香隔岸通金翹徒可泛玉斝竟誰同

詠雪

龍雲玉葉上鶴雪瑞花新影亂銅烏吸光銷玉馬津含
輝明素篆隱迹表祥輪幽蘭不可儷徒自繞陽春

詠水

列名通地紀疎派合天津波隨月色淨態逐桃花春照
霞如隱石映柳若沈鱗終當挹上善屬意淡交人

詠雁

唼藻蒼梧遠銜蘆紫塞長霧深悲晚景風急斷秋行陣
照通宵月書封幾夜霜無復能鳴分空知愧稻梁

餞駱四二首

平生何以樂斗酒夜相逢曲中驚別緒醉裏失愁容星
朗懸秋漢風香入曙鐘明月臨溝水青山幾萬重
甲第驅車入良宵秉燭遊人追竹林會酒獻菊花秋霜
吹飄無已星河漫不流重嗟歡賞地翻召別離憂

渡瓜步江

捧檄辭幽徑鳴榔下貴洲驚濤疑躍馬積氣似連牛月
迴黃沙淨風急夜江秋不學浮雲影他鄉空滯留

王昭君

斂容辭豹尾緘怨度龍鱗金鈿明漢月玉筍染胡塵古
鏡菱花暗愁眉柳葉顰唯有清笳曲時聞芳樹春

樂大夫挽詩五首

可嘆浮生促于嗟此路難邱陵一起恨言笑幾時懽蕭
索郊埏晚荒涼井徑寒誰當門下客獨見有任安
蒿里誰家地松門何代邱百年三萬日一別幾千秋返
照寒無影窮泉凍不流居然同物化何處欲藏舟
昔去梅笳發今來薤露晞彤駟朝帝闕丹旄背王畿城
郭猶疑是原陵稍覺非九原如可作千載與誰歸

一旦先朝菌千秋揜夜臺青烏新兆去白馬故人來草
露當春泣松風向暮哀寧知荒隴外弔鶴自徘徊
忽見靈臺路猶疑水鏡懸何如開白日非復覩青天華
表迎千歲幽扃送百年獨嗟流水引長揜伯牙絃

丹陽刺史挽詩三首

百齡嗟倏忽一旦附山阿丹桂銷亡盡青松哀思多薰
風虛聽曲薤露反成歌自有藏舟處誰憐隙駟過
惻愴恆山羽留連棣萼篇佳城非舊日京兆卽新阡城
郭三千歲邱陵幾萬年唯餘松柏樹朝夕起寒烟

短歌三獻曲長夜九泉臺此室元扃掩何年白日開荒
郊疎古木寒隧積陳芟獨此傷心地松聲薄暮來

五言排律

浮查 有序

遊目川上觀一浮查泛泛然若木偶之乘流迷不知所
適也觀其根柢盤屈枝榦扶疎大則有棟梁舟楫之材
小則有輪轅榱桷之用非夫稟乾坤之秀氣含宇宙之
溘精孰能負凌雲翳日之姿抱積雪封霜之骨向使懷
才幽藪藏穎重崑絕望於廊廟之榮遺形於斤斧之患

固可垂蔭萬畝懸映九霄與建木較其長短將大椿齊
其年壽者而委根險岸託質畏途上爲疾風衝颿所摧
殘下爲奔浪迅波所激射基由壤括勢以地危豈盛衰
之理繫乎時封植之道存乎我一墜泉谷萬里飄淪與
波浮沈隨時逝止雖殷仲文嘆生意已盡孔宣父知朽
質難雕然而遇良工逢仙客牛礪可託玉璜之路非遙
匠石先談萬乘之器何遠故用與不用時也悲夫然則
萬物之相應感者亦奚必同聲同氣而已哉感而賦詩
貽諸同志云耳

昔負千尋質高臨九仞峯貞心凌晚桂勁節掩寒松忽
值風颯折坐爲波浪衝摧殘空有恨擁腫遂無庸渤海
三千里泥沙幾萬重似舟飄不定如梗泛何從仙客終
難託良工豈易逢徒懷萬乘器誰爲一先容

春霽早行

年華開早律霽色蕩芳晨城闕千門曉山河四望春御
溝通太液戚里對平津寶瑟調中婦金壘引上賓劇談
推曼倩驚坐揖陳遵意氣一言合風期萬里親自惟安
直道守拙忌因人談器非先木圖榮異後薪抑揄慙路
鬼憔悴切波臣元草終疲漢烏裘幾滯秦生涯無歲月
歧路有風塵還嗟太行道處處白頭新

秋日山行簡梁大官

束馬陟層阜迴首睇山川攢峯銜宿霧疊巘架寒煙百
重含翠色一道落飛泉香吹分巖桂鮮雲抱石蓮地偏
心易遠致默體逾元得性虛遊刃忘言已棄筌彈冠勞
巧拙結綬倦牽纏不如從四皓邱中鳴一絃

晚度天山有懷京邑

忽上天山路依然想物華雲疑上苑葉雪似御溝花行

馬五集 卷二
嘆戎麾遠坐憐衣帶賒交河浮絕塞弱水浸流沙旅思
徒漂梗歸期未及瓜寧知心斷絕夜夜泣胡笳

晚泊河曲

三秋倦行役千里泛歸潮通波竹箭水輕舸木蘭橈金
隄連曲岸貝闕影浮橋水淨千年近星飛五老遙疊花
開宿浪浮葉下涼颿浦荷疎晚葍津柳漬寒條恹惶勞
梗泛悽斷倦蓬飄仙查不可託河上獨長謠

晚泊蒲類津

一庭歸望斷萬里客心愁山路猶南屬河源自北流晚

風連朔氣新月照邊秋竈火通軍壁烽煙上戍樓龍庭
但苦戰燕領會封侯莫作蘭山下空令漢國羞

晚渡黃河

十里尋歸路一葦亂平源通波連馬頰迸水急龍門照
日榮光淨驚風瑞浪翻棹唱臨風斷樵歌入聽喧岸迴
秋霞落潭深夕霧繁誰堪逝川上日暮他鄉魂

早發淮口望盱眙

養蒙分四瀆習坎奠三荆從帝留餘地封王表舊城岸
昏含蜃氣潮滿應雞聲洲迴連沙淨川虛積溜明一朝

馬元集 卷二 七
從捧檄千里倦懸旌背流桐栢遠逗浦木蘭輕小山迷
隱路大塊切勞生惟有貞心在獨映寒潭清

遠使海曲春夜多懷

長嘯三春晚端居百慮盈未安蝴蝶夢遽切魯禽情別
島連寰海離魂斷戍城流星疑伴使行月似依營懷古
寧期達牽時匪徇名艱虞行已遠時迹自相驚

晚泊江鎮

四運移陰律三翼泛陽侯荷香銷晚夏菊氣入新秋夜
烏喧粉堞宿雁下蘆洲海霧籠邊徼江風繞戍樓轉蓬

別渚徙橘愴離憂魂飛灞陵岸淚盡洞庭流振影希
馮陸逃名謝蟻邱還嗟帝鄉遠空望白雲浮蘇思彩

早發諸暨

征夫懷遠路夙駕上危巒薄煙橫絕巘輕凍澁迴湍野
霧連空暗山風入曙寒帝城臨灞浹禹穴枕江干橘性
行應化蓬心去不安獨掩窮途淚長歌行路難

晚憩田家

轉蓬勞遠役披薜下田家山形類九折水勢急三巴懸
梁接斷岸澁路擁崩查霧巖淪曉魄風激漲寒沙心迹

一朝外關山萬里賒龍章徒表越閩俗本非華旅行悲
之梗離贈斷疎麻唯有寒潭菊獨似故園花

宿山莊

金陵一超忽玉燭幾還周露積吳臺草風入郢門楸林
虛宿斷霧磴險挂懸流拾青非漢策化緇類秦裘牽迹
猶多蹇勞生未寡尤獨此他鄉夢空山明月秋

過張平子墓

西鄂該通理南一擅德音玉卮浮藻麗銅渾積思深忽
懷今日昔非復昔時今日落豐碑暗風來古木吟唯嘆

窮泉下終鬱羨魚心

海曲書情

薄遊倦千里勞生負百年未能查上漢詎肯劍遊燕白
雲照春海青山橫曙天江濤讓雙壁渭水擲三錢坐惜
風光滿長歌獨塊然

邊城落日

紫塞流沙北黃圖灞水東一朝辭俎豆萬里逐沙蓬候
月恒持滿尋源異鑿空野昏邊氣合峯迴戍煙通膂力
風塵倦疆場歲月窮河流控積石山路遠崆峒壯志凌

蒼兕精誠貫白虹君恩如可報龍劍有雌雄

蓬萊鎮

旅客春心斷邊城夜望高野樓疑海氣白鷺似江濤結
綬疲三人承冠泣二毛將飛憐弱羽欲濟乏輕舸賴有
陽春曲窮愁且代勞

宿温城望軍營

虜地寒膠折邊城夜柝聞兵符關帝闕天策動將軍戍
靜胡笳徹沙明楚練分風旗翻翼影霜劍轉龍文白羽
搖如月青山斷若雲煙疎疑卷幔塵滅似銷氛投筆懷

班業臨戎想霍勳還應雪漢恥持此報明君

和孫長史秋日臥病

霍第疎天府潘園近帝臺調絃三婦至置驛五侯來尙
想歡娛洽吁嗟歲月催金壇分上將玉帳引瓌才決勝
鯨波靜騰謀鳥谷開白雲淮水外紫陌灞陵隈節變驚
衰柳筵繁思落梅調神和玉燭挾藻握珠胎悵矣欣懷
土居然欲死灰還因承雅曲暫喜躍沈鯁

四月八日題七級

化城分鳥堞香閣俯龍川複棟侵黃道重簷架紫煙銘

書非晉代壁畫是梁年霸畧今何在王宮尙巋然二帝
曾遊聖三鄉一作卿是偶賢昔茲遊勝侶超彼託良緣我
出有爲界君登非想天悠悠青曠裏蕩蕩白雲前今日
經行處曲音號蓋煙

早秋出塞寄東臺詳政學士

促駕逾三水長驅望五原天街分斗極地理接樓煩溪
月明關隴戎雲聚塞垣山川殊物候風壤異涼溫戍古
秋塵合沙寒宿霧繁昔余迷學步投跡忝詞源蘭渚浮
延閣蓬山欵禁園影纓陪紱冕載筆偶瑱璠汲冢寧詳
蠹秦牢詎辨寃一朝從篋服千里駕輕軒鄉夢隨魂斷
邊聲入聽喧南圖終斂翮北上遠摧轅弔影慙連茹浮
生倦觸籓數奇何以託桃李自無言

餞鄭安陽入蜀

彭山折坂外井絡少城隈地是三巴俗人非百里才長
途君悵望別路我徘徊心賞風煙隔容華歲月催遙遙
分鳳野去去轉龍媒遺錦非前邑鳴琴卽舊臺劍門干
仞起石路五丁開海客乘查渡仙童馭竹迴魂將離鶴
遠思逐斷猿哀唯有雙鳧舄飛去復飛來

在軍中贈先還知己

蓬轉俱行役瓜時獨未還
魂迷金闕路望斷玉門關
獻凱多慙霍論封幾謝班
風塵催白首歲月損紅顏
落雁低秋塞驚鳥起暝灣
胡霜如劍鏢漢月似刀環
別後邊庭樹相思幾度攀

夏日憶張二

伏枕憂思深擁膝獨長吟
烹鯉無尺素筌魚勞寸心
疎麻空有折芳桂湛無斟
廣庭含夕氣閒宇澹虛陰
織蟲垂夜砌驚鳥棲暝林
驩娛百年促羈病一生侵
詎堪孤

月夜流水入鳴琴

和李明府

傳聞葉縣履飛向洛陽城
馳道臨層掖津門對小平
霞殘疑製錦雲度似飄纓
藻揆潘江徹塵虛范甑清
詎憐衝斗氣猶向匣中鳴

望月有所思

九秋涼風肅千里月華開
圓光隨霧湛碎影逐波來
似霜明玉砌如鏡寫珠胎
曉色依關近邊聲雜吹哀
離居分照曜愁緒共徘徊
自繞南飛羽空忝北堂才

寓居洛濱對雪憶謝二

旅思渺難裁衝飆恨易哀曠望洛川晚飄颻瑞雪來積
彩明書帳流韻遶琴臺色奪迎仙羽花避犯靈梅謝庭
賞方逸袁扉掩未開高人儻有訪興盡詎須迴

西行別東臺詳政學士

意氣坐相親關河別故人客似秦川上歌疑易水濱塞
荒行辨玉臺遠尙名輪洩井懷邊將尋源重漢臣上苑
梅花早御溝楊柳新只應持此曲別作邊城春

送吳七遊蜀

日觀分齊壤星橋抵蜀門桃花嘶別路竹葉瀉離尊夏
老蘭猶茂秋深柳尙繁霧銷山望迴風高野聽喧勞歌
徒欲奏贈別竟無言唯有當秋月空照野人園

春晚從李長史遊開道林故山

幽尋極幽壑春望陟春臺雲光棲斷樹霞彩入仙杯古
藤依谷上野徑約山隈落蕊翻風去流鶯滿樹來興闌
荀御動歸路起浮埃

和王記室從趙王春日遊隨山寺

鳥旛陪訪道鷲嶺洽棲真四禪明淨業三空廣勝因祥

河疎疊澗慧日皎重輪葉暗龍宮密花明鹿苑春雕談
筌奧旨妙辯激元津雅曲終難和徒自奏巴人

冬日野望

故人無與晤安步陟山椒野靜連雲捲川明斷霧銷靈
巖聞曉籟洞浦漲秋潮三江歸望斷千里故鄉遙勞歌
徒自奏客魂誰爲招

夕次舊吳

維舟背楚服振策下吳畿盛德宏三讓雄圖枕九圍黃
池通霸業赤壁暢戎威文物俄遷謝英靈有盛衰行歎
鳴夷沒遽惜湛盧飛地古煙塵暗年深館宇稀山川四
望是人事一朝非懸劍空留信亡珠尙識機鄭風遙可
托闕月眇難依西北雲逾滯東南氣轉微徒懷伯通隱
多謝買臣歸唯有荒臺露薄暮溼征衣

過故宋

舊國千年盡荒城四望通雲浮非隱帝日舉類遊童綺
琴朝化洽祥石夜論空馬去遙奔鄭蛇分近帶豐池文
斂束水竹影漏寒叢園兔承行月川鳥避斷風故宋城
難定從梁事未工唯當過周客獨愧吳臺空

詠懷

少年識事淺不知交道難一言芬若桂四海臭如蘭寶劍思存楚金鎚許報韓虛心徒有托循迹諒無端太息關山險吁嗟歲月闌忘機殊會俗守拙異懷安阮籍空長嘯劉琨獨未懽十步庭芳斂三秋隴月團槐疎非盡意松晚夜凌寒悲調絃中急窮愁醉裏寬莫將流水引空向俗人彈

邊夜有懷

漢地行逾遠燕山去不窮城荒猶築怨碣毀尚銘功古

戍煙塵暗邊庭人事空夜關明隴月秋塞急胡風倚伏

良難定榮枯豈易通旅魂勞泛梗離恨斷征蓬蘇武封

猶薄崔駟宦

一作官

不工唯餘北叟意欲寄南飛鴻

久戍邊城有懷京邑

擾擾風塵地遑遑名利途盈虛一易舛心迹兩難俱弱齡小山志寧期大丈夫九微光賁玉千仞忽彈珠棘寺遊三禮蓬山筮八儒懷鉛慙後進投筆願前驅北走非通趙西之似化胡錦車朝促候刁斗夜傳呼戰士青絲絡將軍黃石符連星入寶劍半月上雕弧拜井開疎勒

鳴桴動密須戎機習短蔗祆禳淨長榆季月炎初盡邊

亭草早枯層陰籠古木窮色變寒蕪海鶴聲嘹唳城鳥

尾畢逋葭繁秋色引桂滿夕輪孤一作虛行役風霜久鄉

園夢想徒一作孤灞池遙夏國秦海望陽紆沙塞三千里

京城十二衢楊溝連鳳闕槐路擬鴻都璧殿規宸象金

隄法斗樞雲浮西北葢月照東南隅寶帳垂連理銀牀

轉轆轤廣筵留上客豐饌引中厨漏緩金徒箭嬌繁玉

女壺秋濤飛喻一作玉馬春水泛仙艫意氣風雲合言忘

道術趨共矜名已泰詎肯沫相濡有志慚雕朽無庸類

散樗關山暫超忽形影嘆艱虞結網空知羨圖榮豈自

誣忘情同塞馬比德類宛駒隴坂肝腸絕陽關亭障一作

埃迂迷魂驚落雁離恨斷飛鳥春去容華盡年來歲月

無邊愁傷郢調鄉思繞吳歆河氣通中國山途限外區

相思若可寄冰泮有銜蘆

幽繫書情通簡知已

昔歲逢楊意觀光賁楚材穴疑丹鳳起場似白駒來一

命淪驕餌三緘慎禍胎不言勞倚伏忍此邁邇迴駉馬

刑章峻蒼鷹獄吏猜爭縑非易辨疑璧果難裁揆拙慙

周羨端憂滯夏臺生涯一滅裂歧路幾徘徊青陸芳春
動黃沙旅思催圓扉長寂寂疎網尙恢恢入窅方搖尾
迷津正暴腮覆盆徒望日蟄戶未驚雷霜歇蘭猶敗風
多木屢摧地幽蠶室閉門靜雀羅開自憫秦冤痛誰憐
楚奏哀漢陽窮鳥客梁甫臥龍才有氣還衝斗無時會
鑿坏莫言韓安國長作不然灰

寒夜獨坐遊子多懷簡知己

故鄉渺千里離憂積萬端鶉服長悲碎蝸廬未卜安富
鉤徒有想貧鉢爲誰彈柳秋風葉脆荷曉露文團晚金

叢岸菊餘佩下幽蘭伐木傷心易維桑歸去難獨有孤
明月時照客庭寒

敘寄員半千

薄宦三河道自負十餘年不應驚若厲祇爲直如絃坐
歷山川險吁嗟陵谷遷長吟空抱膝短翮詎冲天魂歸
滄海上望斷白雲前釣名勞拾紫隱迹自談元不學多
能聖惟思鴻寶仙斯志良難已此道豈徒然嗟爲刀筆
吏恥從繩墨牽歧路情難狎人倫地本偏長揖謝時事
獨往訪林泉寄言二三子生死不來旋

棹歌行

寫月塗黃罷凌波拾翠通鏡花搖芰日衣麝入荷風葉
密舟難蕩蓮疎浦易空鳳媒羞自託鴛翼恨難窮秋帳
燈光翠倡樓粉色紅相思無別曲併在棹歌中

傷祝阿王明府

有序

夫心之悲矣非關春秋之氣聲之哀也豈移金石之音
何則事感則萬緒興端情應則百憂交軫是以宣尼舊
館流襟動激楚之悲孟嘗高臺承曉下聞琴之淚祝阿
王明府毓德丹穴襲吉黃裳靈基峙金闕之峯層源瀨

玉輪之坂旣而鴻飛漸陸將騁平輿之龍鶴鳴在陰爰
糾朝歌之驥乃當名懸闕月德貫陳星豈徒遽切夢瓊
淹沈連石嗟乎輪銷桂魄驪珠毀貝闕之前斗散紫氛
龍劍沒延平之水某夙承嘉惠曲荷恩光留連嘯歌從
容風月撫心陳迹泣血漣如然而始終者萬物之大歸
生死者百年之常分雖則知理之可有而未曉情之可
無聊綴悲歌敢貽同好諸君或締交三益列宰一同或
叶契筌蹄投心膠漆如比肩於千里遽傷魂於九原旣
切芝焚彌深蕙嘆盍言四始同賦七哀庶蘭室流薰襲

遺芳而化德故蓬心申拙效庸音於起予觸目多懷周

一作增流慟

洛川真氣上重泉惠政融含章光後列繼武嗣前雄契

與一作與善

良難驗生涯忽易窮翔鳧猶化履狎雉尚馴童

錢滿荒階綠塵浮虛帳紅夏餘將宿草秋近未驚蓬烟

晦泉門閉日遠夜臺空誰堪孤隴外獨聽白楊風

五言絕句

在軍登城樓

城上風威冷江中水氣寒戎衣何日定歌舞人長安

易水送人

此地別燕丹壯士髮衝冠昔時人已沒今日水猶寒

挑燈杖

稟質非貪熱焦心豈憚熬終知不自潤何處用脂膏

詠塵

凌波起羅襪含風染素衣別有知音調聞歌應自飛

翫初月

忌滿光恒缺乘昏影漸流自能明似鏡何用曲如鉤

詠鏡

寫月無芳桂照日有花菱不特光謝水翻將影學冰

詠鵝雜言

鵝鵝鵝曲項向天歌白毛浮綠水紅掌撥青波

七言絕句

憶蜀地佳人

東西吳蜀關山遠魚來鴈去兩難聞莫怪嘗有千行淚

只為陽臺一片雲

番禺黃 濤初校

番禺沈 和覆校

